



Etty Toppenberg

e artista mas stima di pueblo

MI a tende di dje y mi a lese riba face book. Sra. Ingrid Werleman a saca hopi bunita potret y post e informacion riba facebook. Te cu porfin dos siman pasa mi a bay pa scuche y wak pa mi mes, con dushi e ambiente ta dilanti Diespie's Place, riba diabierna atardecer, ora cu solo ta bahando drenta nochi bay culmina cu e canticanan di mas dushi cu mayoria di nos conose. Mi no sa si e grupo di musiconan aki tin un number, mi no sa si ta tur ta profesional of amateur, pero un cos si, tur tin curason, amor y pasion pa musica, tocando hunto cu e artista profesional cu curason, mas y mas stima den pueblo Etty Toppenberg. Ta ken no conoce? Ta ken no a yega di tende toca guitarra y canta?

Mi por a tende tambe, cu cada bez e publico cu ta bay scucha nan toca y canta ta birando mas y mas grandi. Y ta mas y mas grandi tambe e amor p'e talento incansabel di Etty. E ta cuminsa toca y canta for di ora solo baha te ora luna ya ta hopi halto na shelo dorna di streanan bunita cu ta inspira e streanan bunita cu ta canta hunto cu Etty of cu ta baila riba e dushi ritmonan varia y alegre cu Etty y su grupo ta produci ey mes, dilanti Diespie's Place, riba e plaza bunita dorna na klinkers y un bunita fontein di awa. Ki bunita pa sinti y wak tanto dushi energia alegre hunto asina! Un sorto di happy hour, pero uno bastante largo.

No di un ora, pero di 3 pa 4 ora non stop di canto y musica cu ta alegre e curason y alma sigur! Nos troubadour Rubiano, esun cu ta inspira letranan e momento ey mes, pone sonrisa riba tur e caranan. E di dos biaha, e di dos diabierna cu Lady Ruth a bay, el a keda encanta y impresiona atrobe, por a observa con hopi di nos dushi hendenan local ta move y baila den pareha, den grupo of nan so cu nan so, gozando y disfrutando di un tremendo show y dunando nan show nan mes! E biaha aki, Etty bisti na preto pa despues di un rato cambia su pechi colorido pa un sombre manera esun di "De Gelaarsde kat" cu su pluma na banda patras.

Etty a baha den publico y baila un crenchi cu varios di su dushi hendenan. Etty ta canta den

6 of ta 7 idioma cu e mesun pasion den cada expresion, hunga cu wega di palabra y pone hende hari sinti full relaha. Cu gran aplauso di e publico grandi, mas grandi cada biaha. Biaha pasa ora Etty a canta un di su bunita cancionnan pa su bario stima Compa Nashi, Lady Ruth kier a dal e grito di alegria: "Dakota tur dia" pero no tabatin espacio, pasobra ta tra'i otro e canticanan tabata wordo toca y canta, cu apenas un par di seconde tin biaha pa sea baha of subi e tono musical.

Lady Ruth por a observa y nota cu ta tur sorto di hende ta forma e publico p'e gran y dushi concierto publico aki den aire liber, tur hende cu ta gusta musica, hendenan cu ta gusta baila, hendenan cu ta gusta canta.

E team dinamico y potente di Diespie's Place ta duna nan servicio excelente, ta hopi atento y hopi amabel, mientras Diespie mes y su distinguida sra. esposa ta sinta dilanti e stoepi, cu t'e pida stage, riba cual e grupo di musico ta para cu algun para abao na banda. Simpel, nada complica. Si pa hopi e segundo himno di Aruba t'e cantica "Abo so" di Padu Lampe, segun e gran artista Arubiano aki e segundo himno t'e cancion ranchera El rey. Etty ta canta e cancionan di mas bunita cu bo no ta tende na radio. Etty ta canta cu su alma. Etty ta canta, canta y sigui canta cu amor y pasion pa inspira e curasonnan eyfo cu mester di alegria!! Tur sorto di cancion!!! Na final di e concierto unico den su estilo y super dushi aki, hendenan ta bosha pa bay saluda e gran yiu di tera aki, cu a cuminsa cu algo cu no por wordo iguala. Cu Dios sigui drama su bendicion riba e musica guitarista cantante aki cu ta duna hopi hende e oportunidad di goza tur diabierna anochi, topa otro, combersa, canta y baila, wapa of huppelen, pero Etty no ta gusta bachata, sina ta, wak pa bo baila bo chachacha of son montuno of bolero bon!!!

Y corda bay cu un curason yena di gradicimento p'e dushi momento aki, un momento special na unda tur hende ta bon bini, na unda e union ta den cada melodia y den cada cancion. God bless!!!

